

La chanzun rumantscha

Questa saira: Pop e rock (2)

DA BENEDETTO VIGNE

Emprims fastizs dal rock rumantsch chattain nus gia durant ils onns sessanta – tgi sa regorda per exempel anc da la gruppa Hangovers da Tavanasa, ch'era perfin ida a finir en in'emissiun festiva da Balcun Tort? L'emprima gronda fluriziun da rock, pop e stilisticas parentadas registrain nus dentant a chaschun da la retscha da Festivals da la Musica Rumantscha a Mustér, durant ils onns otganta. Ma l'euforia ha cuzzà pauc temp: «... per chavar la fossa dal rock rumantsch èsi memia baud, ma ina pitschna cura per il pazient fiss necessaria, schizunt in pau doping fiss permiss...» scriveva Arnold Rauch anno 1994, en il carnet da la famosa cumpilaziun «Porta la tatta», edida da Battaporta, l'emissiun giuvenila barmiera dal Radio Rumantsch. La cura è dentant vegnida ed ha gè success, cun renaschientschas e regiuvenaziuns, si Tujetsch, a Scuol, en la Val Schons, perfin giu en la diaspora. Ed il rock e pop rumantsch cuntinuescha a resunar, cun e senza doping.

Viver veta: Dals rests da la gruppa Hades era naschida ils emprims 90 la gruppa Roc'o'Congo, curunada da la vusch dad *Alice Darms*. Frestgezza sonora irlandaisa marca la chanzun, ma ina midada da tempo alludescha a las forzas che na vulan laschar viver mai «sco jeu sun».

Muond in mai: *Roland Vöggtli* e sia gruppa AndaRojo han salvà ils tuns «tschufs» en per ils onns 2000. E furnì in bel «hardrocker» cun orgelin per la retscha Top Pop Rumantsch. Guidà da



la sentenza filosofica che per midar il mund ston ins cumenzar mintgamai tar sasez.

Miu dé: «Oz è il dé nu ch'ju sun vâgnius ble ple gronds» (2001). *Pascal Gamboni* e ses Passiunai n'han betg mo introducì il dialect tuatschin en la musica rock, els han er rut la virginitad – en plirs senns – cun ina melodia interstailara ed

ina frasa bunamain infantila. Donn ch'els han lura chalà.

Mira cheu: Sut il pseudonim Rezia Spontana han *Corin Curschellas* e *Benedetto Vigne* participà anno 1983 – sco emprims Rumantschs – a la preselecziun svizra da l'Eurovision. La musica ballinanta era vegnida scritta da Peter Wydler, in enconuscent, ed il text n'era politicamain betg daltut correct.

Spetga, neu: Malsegirtads pubertaras vegnan gugent reflectadas en la musica giuvenila – en moda directa ed indirecta tar quest toc rudimentari da la gruppa Ba-Rock e ses chantant Gioni Fry, anno 1988. Passaschas diras sa midan cun muments meditatifs, ma la chanzun fa tuttina curaschi.

La brev d'amur: Scuntrada eterogena per ina causa dispitada, capitada l'onn 1989. Da las *soras Scherrer* enfin tar *Paulin Nutoclà* – tut las vuschs alternativas rumantschas han chantà duas lingias en favur dal Rumantsch Grischun, tenor in text da Flurin Spescha ed ina melodia da Flurin Caviezel.

La pura: Tuns novs per in purtret dal passà. L'onn 1992 ha Corin Curschellas mess en musica ina veglia poesia da Gion Cadieli, resguardond surtut ils suns «etnics» da l'orgelin da maun oramai rescuverts. La chanzun è daventada in pitschen hit er sin las undas nazionalas.

Angelina: En lur fasa finala 1992 èn *Elmar Deflorin* e ses Hades finalmain daventads concrets – «Angelina, jeu less durmir cun tei». Quel garegiar charnal, raramain exprimi en il rock rumantsch, gieva silmain bain a prà cun la tunalitad dira, masculina da la «starband» da Mustér.

Bandunau: *Simona Caminada* s'ha regordà dad ina vusch amia, *Claudia Lombris*, ed ensemen hani proponi il 2008 a la retscha Top Pop ina collavuraziun sut il num «Not Yet». La chanzun va en moll e tracta in tema fitg popular en la chanzun rumantscha – ma ella lascha sperar vers la fin.

Inreschantüm: Ils giuvens rockadurs fan magari opposiziun a las generaziuns pli veglias – ma alura vani e fan precis il medem sco ils babuns, i chantan davart la patria e l'encreschadetgna e la bella lingua da la mamma. Betg da sa smirvegliar che la ballada da la gruppa Influenza è daventada in favorit.

Daners, daners: En lur emprima furnaziun dal 1984 laschavan ils Hades anc dudir influenzas dal chant tradiziunal rumantsch – sper zinslas da tuns electronics tudestgs. E la poesia dad Alfons Tuor (1871–1904) demussava ch'ils tuns critics n'eran betg in'invenziun da la generaziun «rockadura».

Tadlai e vuschai

Questa saira e damaun sunter mezdi pudais vus dar la vusch a Vossa chanzun preferida che cumbatta ils 5 da december 2009 forsà per il titel da La chanzun rumantscha.

Tadlai Radio Rumantsch: Mesemna, 28-10-2009, 19.00–20.00 e gievgia, 29-10-2009, 14.00–15.00. Telefonar (80 raps per clom) e vuschar pudais vus lura mintgamai durant las 2 uras che suondan l'emissiun radio.

Oz en concorrenza

01 **Viver veta** – Roc'O'Congo

| 0901 59 16 01

02 **Muond in mai** – Roland Vöggtli

| 0901 59 16 02

03 **Miu dé** – Pascal Gamboni

| 0901 59 16 03

04 **Mira cheu** – Peter Wydler

| 0901 59 16 04

05 **Spetga, neu** – Gioni Fry

| 0901 59 16 05

06 **La brev d'amur** – Flurin Caviezel

| 0901 59 16 06

07 **La pura** – Corin Curschellas

| 0901 59 16 07

08 **Angelina** – Hades | 0901 59 16 08

09 **Bandunau** – Claudia Lombris

| 0901 59 16 09

10 **Inreschantüm** – Influenza

| 0901 59 16 10

11 **Daners, Daners** – Hades

| 0901 59 16 11

Anc dapli infurmaziuns sin www.rtr.ch